

Waageclique Wolfschlucht-Deppe

Fasnacht 2010

WOLFSCHLUCHT-DEPPE



BASEL 1998

Sujet:

Mir wärde ussugsuggt

Zerscht muess me ebbis Wichtig's saage,
mir sin gsund und hän nyt z'klaage,
hän niene weh und kaini Wunde
und im Bluet au kaini Tierli gfunde.
Doch – s'isch nit glatt und nit zem spasse,
zahle nur verdeggel – ewig Granggekasse.

Bim Bund lauft ebbis krumm,
und dr Ständeroot blyybt aifach stumm.
Syt langem hett me's derte gheert,
dä Zuestand isch doch unerheert.
S'Gsundhaitswäase isch jo grangg
und d'Granggekasse schynbar blangg.
Vom Rächne – hän die kai Schimmer,
so wärde d'Keschte als wie schlimmer.
So stygge d'Prämie Joohr fir Joohr,
das git em Bebbi mänggi graui Hoohr.
Dr Schwaissusbruch isch programmiert,
me waiss nit, wo das aanefiert.
Grangg sy – ka me sich nimm laische,
so gooht's uff jedefall de Maischte.
Doch au gsund sy – dytlig duet me's fyyle,
koschtet e Vermööge – s'isch zem hyyle.

Mir sin iberzyggt und glaube fescht,
dr Couschpäng isch dr allergrescht,
nur bim Gsundhaitsdängge fählt's emänd,
do isch sy Gaischt emänd am Änd.
Dert kunnt s'Dängge nimme noo,
ai Dail hett'r bi dr Spitex gloo.
Me sett dä Maa e bitz go pfläage,
denn stooht er nit ellai im Rääge.
Me sett em hälfe, s'wär nit schlächt
und wär em Schwyzerbirger numme rächt,
denn im Bundesroot – muess das denn sy?
Schnuurt dr Couschpäng immer dry.
Syt Joohre isch dä Zuestand unerheert
und die Prämie-Gschichte aifach gschteert.
Doch ändlig, ändlig hett er Abschiid gnoo,
nur hoochi Prämie blyybe stooch.

Me wäggslet d'Kasse grad vo do no dert,
sozial isch das doch hailoos gsteert,
e Monet speeter – das muesch wisse,
bisch au derte wiider bschisse.
Egal wie sich die neyi Kasse nennt,
bim Wäggsel hett me sich au do verrennt.
Zerscht kasch emänd zwai Frangge spaare,
denn muess me's laider gly erfaahre,
d'Verwaltigs-Keschte stygge stail nach oobe,
scho hän sich d'Prämie nonemol verschoobe.
Eso isch alles halt bim alte bliibe
und d'Prämie hett me wytter uff triibe.
Das alles isch doch unerheert,
fir d'Gsundhait-Keschte aifach gschteert.

Mir gsehn do numme no ai Wäg:
Wolfschlucht-Deppe – blyybet zwäg,
mir hoffe uff e huffe gsundi Daage,
uff unsrem gsunde Waggis-Waage.
Dert dien mir d'Prämie sälber stygge
und denne prächtig Fasnacht fyire.